

5 Minuten

Es is no ned amoi gscheit hell.
Wennst schlofst vageht die Zeit meistens schnell.
I drah mi hoit no gschwind amoi um,
mein Wecker schoit i amoi nu auf stumm -
fia 5 Minuten nur...

Es is no ned amoi gscheit koit
und scho da zweite Schnee, der foit.
De Wiesn und de Weg san scho zua.
I stö ma hoit die Sunn afoch vua -
fia 5 Minuten nur...

Wir haum uns ned amoi gscheit gsehn.
Ois Kinder woit ma ois überstehn.
Gredt hama bei Weitem ned gnua.
I schau jetzt afoch ned auf die Uhr -
fia 5 Minuten nur...

I hob di nid amoi gscheit kennt
und trotzdem gspia i dass die Feia in mir brennt.
So Vieles host du nimma mehr gsehn,
ma wos tät i gebm -
fia 5 Minuten nur...